

六一山房詩集

六一山房詩集卷八

戊辰

鄞董沛覺軒

戊辰

出門

我生四十載遠無千里行徒以老母在遊子難爲情慘  
慘風木歌歲月亦幾更忽焉志四方慷慨賦北征

二

可憐慈母綫猶是身上衣登堂拜遺像恍恍聞訓辭獨  
居意不樂矧在行邁時一第亦溷人奚解心骨悲

三

殷殷屬諸弟吾家儒素門此別當半載忍使形影分北  
風吹南雁飄然離其羣好寄平安書慰我行路人

四

親朋百餘輩肅肅衣冠來謂我遠道行願我言笑開北  
望長安中高築黃金臺君去須努力

明廷無棄材

五

少姬年十九頗覺心緒孤淒然別離色對我一語無有  
女未及笄含淚牽衣裾我亦姑置之出門戒僕夫

六

僕夫整囊篋催我登行舟日出東南隅照見河水流河水紆以曲與我相綢繆惘惘出門去去作燕山遊

滬上雜詩

十六年前此地過荒煙蔓草亂墳多無端寫入揚州夢比戶笙簫隔院歌

二

海舶乘潮萬里來東西黃浦港流開瀕江列柵通官道猶認當年舊礮臺

三

蠟粉牆高列四圍樓房平敞曬氈衣明窗百摺琉璃樣

粵女成行夜夜歸

西洋屋舍宏邃光潔綿互數里番妓皆廣東人

四

兩輪車子碧油篷南北分馳四路中

馬道宏闊鋪沙為地自北之南凡四

更向春郊看賭馬珊鞭金勒快如風

西人賭馬以千金決勝負

五

現出人閒小史身低鬟斜嬾舞衣新不須更聽漁陽鼓

征戰年來鬧煞人

雛伶七八歲能演劇曰貓兒戲北部自津門來則稱武班

六

麗水松風

皆茶館名

茗飲清座隅窗格最空明高樓日影纔

西轉遊女如花各送迎

七

屏角懸燈影半殘市樓深處不知寒行廚競說津門好

應笑吳中舊食單

飲饌以天津館爲佳競尙北菜

八

曲院千家樂未休吳門少妓儘風流斜陽紅映桃花面

半倚門闌半倚樓

南北兩路曲院相接門外懸燈寫某堂某家

九

塵肆縱橫十里遙到來洋貨一時銷

貿易既成日銷貨

市兒會

得西番語裝點衣衫賤亦驕

十

趁好耶穌禮拜期燈筵沈醉漏深時殷勤猶道中宵別

初日銅鉦挂樹枝

西洋七日一禮拜估客無事行樂恆徹夜

十一

鐵管千枝一氣通夜來地火滿街紅行人指點分明路

不待奚奴喚燭籠

地火用頗黎燈通以鐵管西人於數里外燒煤鼓火一氣流注便可點放

十二

我到洋涇試泊舟行裝緩緩且勾畱東南第一銷金窟

莫問蘇杭舊勝遊

輪船中作

上艙如鴿籠下艙如豕欄行囊置空隙徐步亦苦艱出

滬抵津門計里贏四千險與蛟龍爭命若絲髮懸迴輪  
水旋激聒耳聲闐闐洪冶鼓烈火上薄青霄煙一葦縱  
所如萬頃凌茫然離家日以遠憂思空纏綿

二

五更發黃浦黎明出吳淞天吳忽相厄陣陣遭逆風掀  
我船身高一躍如墮空同侶面灰色我亦心怔忡兩餐  
不下咽枵腹胡能充目眩身更搖慄慄危懼中縹渺仙  
人家此去當瀛蓬梨棗解飢渴吾豈東王公

三

迢迢清水洋一碧混天色船底起浪花依舊雪痕白是



日雲氣開風力亦少息憑舷豁大觀滄溟浩難測羅經  
辨方位行度參星極避沙直向東迴船指西北似在空  
中行凌霄奮孤翼斜日墮艙門清水已成黑

四

一昔渡黑水曉起過登州遠望煙臺山蒼翠嵐光浮陡  
然遇奇險四面風颼颼兼之大雨雪撲落皆冰毬巨浪  
挾雷聲山壓艙中樓機輪勢相阻轉側不自由可憐同  
舟人相對泣楚囚號呼禱神佛各各親孥愁我亦蒙被  
臥默想王勃李白傳騎鯨上天去遺魄沈洪流愧我非  
其才不敢同遨遊願假片帆利安穩抵渡頭

五

晝日起朔風徹夜尙不止聽其橫逆行船邊作船底聲  
見遼海中巍然一山峙童童無草木火色露全體是山  
阻上流風定水如砥疑借鯢鼇靈來救一船死船上張  
五帆鼓浪行益駛瞬息抵大沽津門近在咫尺拍手慶再  
生奚獨我心喜萬命爭須臾思之潛焉涕

自大沽口至紫竹林

海口無一山天然阻沙險沙中舊有門其隘僅容艦兩  
岸高築隄中流水色黷紆曲通運河輪舟亦輻輳乃有  
領港船導之出深窰一灣重一灣愈進水愈減比戶干

百家泥屋傍厓隄濱海魚鹽饒俗樸示非儉一帶黃土  
牆柴扉日常掩行抵紫竹林暝色已幽闇東海吐月華  
照見遠山潛息慮且安眠孤夢寄湘簾

天津

破浪乘風此壯遊津門曉日一登樓沈沙互作關形險  
運路開成水道修地接幽燕雄左輔海趨遼瀋莽東流  
茫茫碣石今何在禹跡難尋古冀州

二

大沽壁壘屹西東此是名王舊戰功豈料衛青頻出塞  
翻因魏絳遽和我良家子弟軍心散絕域回圖譯口通

七十二灣河勢曲竟教番船達燕中

三

農桑本計已全非原野荒涼草不肥泥滑車單驅馬過  
風寒弓燥獵禽歸河船身重沙隄狹村戶鱗排瓦屋稀  
讀史每懷元相策誰興水利沃東畿

四

況復河閒作戰場鄰封無恙亦嚴防譏訶行李關丁健  
調遣兵符驛使忙五六日中消息換四千里外夢魂長  
猶畱一綫南來路且寄平安訊故鄉

別劉光祿

炳文

同行六七子惟汝客天津芳草難爲別名花舊是鄰  
瀟經胡舶險塵撲洛衣新卻待春三月長安作酒人

平野蒼茫極天無際遙望煙樹叢中村舍隱隱如  
在湖曲作二絕句

彌望平疇接太荒淡煙一抹繪微茫幾家茆屋疎林外  
風景依稀似水鄉

二

我來指點問前途儘好遙看近卻無仍是西行車馬路  
運河帆影亦模糊

通州道中紀事

北風蕩寒雪夜靜衣被單曉起催上車臨發猶盤桓呼  
僮具餅餌聊以當朝餐旭日升自東一一整轡鞍出門  
向西去沙路何杳漫見曉雪已消渾淖阻轍轅疲驪四  
蹶陷驂馬亦驚屢叱之不肯行昂首嘶聲酸風來揭車  
幕刮面如刀剜拍手呼同行奚惜囊中錢左右置兩騎  
募夫同挽牽耳聞邪許聲努力推之前前車復後車歷  
試窪泥艱一日不停軌忍此飢且寒計里僅逾廿纔抵  
張家灣客邸苦不多絡繹車馬喧百輛共一家旅夢胡  
能安中庭坐明月惆悵思故園園中桃李樹樹爭芳  
妍可以酌清酒團坐兒女歡胡爲苦征役際此行路難

舟輿兩危殆道殒力已殫安得尹喜來東望開秦關

曉發張家灣

曙色蒼茫裏驅車出舊城  
駝衝沙路窄犬臥麥田平  
殘雪添峯勢驚濤撼樹聲  
都門行漸近緩緩賦西征

途中卽事成五十六言

策馬長征路不頗京西山影遠嵯峨松林繞塔無飛鳥  
麥隴開田有健騾出塞衣裝胡女豔近畿塋墓貴人多  
廣渠門外獨行稅一任公車絡繹過

夢得首二句足成之

琪花寶樹金銀臺眼中之人安在哉  
翩然獨鶴九霄下

長安煙霧非蓬萊人生在世輕離別北地南天浪行跡  
迢迢碧海無盡期萬古團圞一輪月

都門雜感

冀河三面盡堯封舊日梯航萬國同歷歷星辰皆拱北  
滔滔江漢自朝東重洋轉粟雲帆捷荒土開屯雪窖豐  
畢竟

神都資翼衛極邊關塞控華戎

二

漁陽東去隔天津臥榻難容鼾睡人一自運河通外海  
竟憑互市息邊塵蒙皮已曉狐威假投骨猶憐犬性馴



莫道羈縻無善策漢唐前事有和親

三

汴流橫溢濟流深齊豫年來半陸沈幾見荒城屯趙草  
翻教狂寇奉韓林懷襄十載宣房警絲竹千秋壤宅音  
近接畿南頻縱突焦勞奚慰

九重心

四

恩恩鈴馬羽書馳分檄東西兩路師

天語輝煌功罪論地形險要霸王基蕭何早繼關中粟  
劉禮新開灞上旗聞道捷音連日到好收全局待勳碑

孤兒行爲陶生作

孤兒年十五五載隸歌部孤兒翩翩丰貌都誰識孤兒

意中苦

一解

兒陶氏家錢唐祖若父列戎行祖官四品

父五品兒四歲時遭祖喪

二解

東南方用兵大帥調父

征孤兒六歲牽父衣不知父往何方行

三解

同行火伴

逃生回謂父戰死不得歸可憐孤兒依寡母何能遠覓

沙場戶寡母哭孤兒啼寡母凍孤兒飢權宜鬻兒寄嫗

戚月取其資供母食

四解

明年庚申二月賊自杭州北

門入母遭寇矣身殉之孤兒七歲陷虎穴

五解

虎穴危

復危兒在姑蘇臺孤兒苦復苦呼賊作假父假父脫走

幾般兒一賊憐我收養之夜臥苦與茹朝受鞭與笞辛

苦賊中倖不死比兒出城十歲矣六解官軍來健如虎

挾孤兒走黃浦揚人販生口輾轉問售主兒年十一賣

人都聯星堂上教歌舞七解昨歲登戲場羞澁兒女裝

對人且歡笑背人心惻怛辱莫辱兮縉紳子遠莫遠兮

湖水鄉八解百草萋萋中有蕙蘭百鳥啁啾中有鳳鸞

吁嗟孤兒兮誰知爾祖父皆命官九解父死忠母死節

奚贖孤兒身奚請

天子卹吾爲爾作歌兮鬼語燈前夜鳴咽十解

# 天甯寺

纔到清涼境繁華過眼空隋皇曾建塔魏代此遺宮爽

氣西山挹眞靈上界通紛紛遊覽什誰繼李崕峒

寺中多北

地遊眺詩

四月四日同郡公讌集者百五十人詩以紀盛

天街錦繡萬花競九陌隆隆鬪車乘

聖皇有詔遴羣才吾郡公車獨稱盛東南解甲韜干戈

兩浙三年開四科丹山赤水耀靈秀秋風鳴鹿揚者多

聯翩北征戒行李咫尺滄溟渡萬里或從徐克迂道來

下馬卸裝集京邸紛紛冠蓋長安春握手款語皆鄉親

況復班聯厠槐棘亦有袞袞京朝紳日吉辰良大開讌

新交故交迭相見華堂平敞三十筵晝日聽歌夜忘倦  
於時首夏天氣清祥暉普照樓窗明珉麋瓊漿列瑤席  
櫻桃紅熟蘆筍青梨園子弟好身手結束登場世無偶  
管絃柔膩雛燕嬌顰鼓殷闐怒龍吼酣歌豪飲曾幾時  
蒼然暝色西山西蓮燈簇簇吐華豔流霞四射明星低  
歌亦不停飲不散花光照人燭光亂遙遙遞出宮漏聲  
遠寺鳴鐘夜將旦出門一笑興如飛淋漓殘酒痕滿衣  
客有豪者眉色舞驅馬且送歌兒歸歸來旅館隱几臥  
夢想鈞天集廣座明朝酬酢還出門轆轤高軒寓樓過  
元明到今六百年吾鄉此會前無前我願後來更居上

當有和者繼此篇

長安酒樓題壁

瓊宇瑤臺列九天  
霓裳舊侶舞蹁跹  
淵雲幾輩王門客  
風月三分酒市仙  
別有性靈參慧業  
早從祕密悟癡禪  
六萌車子紅塵路  
醉看桃花各自憐

聞同年柴季眉明經

佐廷

計寄挽以詩

昔我垂髫時與君同縣試

歲在己亥余年十二君十一

江右舒令君

恭受愛我兩人慧命之列座  
隅樞衣作文字人  
詫童子科  
虛聲噪騏驎  
自此卅年來往還  
若昆季君舟爲我停我  
酒與君醉聯翩踏省門  
秋風歎憔悴我已上書君僅

少其二可憐強仕年青氈坐相對一擊誤秦車君志已  
不遂而況愁病身復遭鬼伯忌浩浩飈輪中浮生渺如  
寄

二

春初我北征聞君已邁疾豈謂君死期相隔僅半月家  
書遲遲來淒然痛長別別酒吳山高歸夢遼海闊旅館  
森林柯迴風蕩沈鬱悠悠生死情何以解凝結君性素  
豪邁謀生計偏拙此後藐諸孤嫠婦守家室君有胸中  
言耿耿向誰說恨不著翅飛執手與君訣淒迷走蛟龍  
堂堂去白日仰視天沈寥魂氣兩飄忽

雲郎曲

晴風旖旎晴花簇十里斜街轉輪轂銀屏繡闥爐煙薰  
華燭堂前教歌曲就中雲郎何翩翩去年九月纔入燕  
翡紅翠碧珍珠鈿京華小隊靈瓊仙縷冰爲肌玉爲骨  
秀出班行年二八鸞笙鳳管相和鳴疑在蓬萊舊宮闕  
女兒裝束登場來雲郎一笑千眸迴綫綫髮髻粲瑤朵  
碧月纖痕初上眉含桃欲語海棠睡斜倚雕闌作沈醉  
颯風捲袖忽盤旋故轉秋波弄嬌媚伊州一曲聲繞梁  
梁塵不動微有香琵琶掩抑訴哀怨能使聽者神黯傷  
歌臺結尾送蘭馭雲郎卸裝出門去飛箋絡繹催上車



夜佐歡筵達曙雲  
郎婉變花不如囊中麗錦盤中珠  
繁華過眼易銷歇  
願爾善保千金軀  
豪家子弟纏頭綵  
豈有深情注滄海  
鳥巢依舊雛兒飛  
老輩何戡幾人在

贈同年陳清甫舍人

清瑞

攝念歸空寂  
歌臺悔舊盟  
艱難門戶計  
鄭重弟兄情  
殘碣摹書影  
孤燈數漏聲  
紅塵彌道路  
讓汝濁中清

陶然亭用查他山韻

江郎亭子作清遊

亭爲工部郎江藻所建

風有微香水細流  
塵壁

模糊誰姓氏  
歡場歌詠幾春秋  
疏煙一抹凝山黛  
明月孤輪出樹頭  
擬與同人修禊事  
柳邊添箇木蘭舟

錄別

下車忽怊恍執手前致辭相見大不易奈何遽別離有  
琴無好音有酒斟酌之非以佐君歡聊慰途中飢願君  
須臾畱猶勝別後思熒熒孤燈光照見雙涕洟

二

分明兩人語疑在魂夢中高樓好月色視之轉濛濛胸  
有千萬言欲訴將何從不願黃金贈但願音書通臨行  
卻回顧記此淒然容嗚咽道珍重明日西與東

通州

漢家馮翊佐神京不愧雄州赤緊名斜日北城孤塔倚

大河東渡萬艘橫  
綱丁隊隊都輸粟  
戰士森森尙列營  
幸我蕭閒仍作客  
野橋驢背暢詩情

津門寫憶卽寄同年許竹簣庶常

景澄

沈芸閣明

府銘經

鍾筇聲

慈生

許培之

慶恩

兩孝廉

一日不相見  
無由遣悶懷  
別離今遠道  
歌舞舊高臺  
折翼偏孤夢  
騎腸奈九迴  
運河流水曲  
東去幾時回

二

是亦佳公子  
飄零十五春  
黃金誰市骨  
白璧此完身  
傀儡場中影  
湖山劫後塵  
茫茫生世感  
欲語轉艱辛

三

勞汝東門餞離筵慘不歡兩行餘涕淚一語致平安忍  
說逢場戲翻歌行路難河梁淒絕處扶我上征鞍

四

吾黨二三子平生可久要君心須記取予尾尙漂搖願  
作崑崙俠奚容叱利驕相期秋八月同看浙江潮

屠蓉仙孝廉

熊占

歿於京邸余以其喪歸道中作

詩哭之

結交三十年忽已成永訣料知死者心猶然痛離別高  
堂白髮親明歲開八秩長兒雖成家其次未授室遲遲  
行邁中中心蘊以結此事殊未了胡能拚一決厄運遭

龍蛇回生竟無術可憐長逝魂離家祇三月

二

與子同舟來滄海片帆渡中道邁逆風頗悔此行誤攬  
衣登津門驛車邁前路遂次京邸中行旌暫焉駐比屋  
謀所居聯牀話平素惟子總角交故者無失故吾意頗  
自豪朋輩屢相忤每以睚眦嫌爲子薄言愬而子解釋  
之不厭語煩絮能使吾心平曠然廓塵霧

三

子身癯而長稟賦亦單弱出閨纔一句鬼伯竟爲虐知  
子非沈疴愧我無良藥奄奄三提中遽爾委諸壑疇昔

曾有言肝膽此相託忍使九泉下怨我舊情薄爲子整  
棺衾爲子理囊橐一一親檢之安肯負深諾寒月照空  
牀淒風揭孤幕逝者不可追愀然奠杯酌

四

時日大吉利送子靈輿歸駕言出東門大道黃塵飛滾  
滾河水流一去不復回我身與子魄旦夕猶相依昨夜  
漏三下夢子翩然來顧我但微笑執手無一辭夢子子  
不語哭子子不知願子一縷魂無復他鄉羈我歌行路  
難重以長相思行路已將返相思無絕期

望海寺

溟渤周無外天容壓水低魚龍呈變相奎壁紀

宸題佛現須彌境官修格淀隄回頭望山色遙指大都

西

出大沽口

仙山何處指蓬壺萬里行舟客自孤日落風微波似鏡  
好將東海比西湖

泊煙臺

府海稱天險齊東此扼關帆檣橫落際樓閣倚層山遠  
道佔人集窮邊戍卒閒卻憐河北路征戰幾人還

田橫島

三齊亡田橫走尺土莫非漢家有懸洲一角東海東黑  
子彈丸此焉守高帝有詔田橫來大王小侯印纍纍二  
客相從到秦市不肯戴頭見天子以頭付客客亦殉餘  
五百人同日死嗚呼田橫能得士遺尸藉藉孤島中殷  
頑之墓周王封至今華表無片石猶見峯頭鬼燈碧

晚次黃浦港

重到春申浦征衣尙淚痕雲山遊是夢江海水皆渾別  
後書千里愁邊酒一樽茫茫村樹合未夕氣先昏

滬上送黃賓陽判官

文炅

海外同舟來握手問鄉縣君言蜀道難我帽在天半舟



中得我詩讀之竟忘倦謂可抗吳梅朱竹垞使我一惶汗

相約滬上游笙歌啟華譙僕夫理歸裝君心尙畱戀天

末起朔風浮雲易消散客中送客行離緒倍牽綰聞君

官滇南萬里隔吾面願君時寄書迢迢望魚雁

到家

遼海波濤惡津門烽火愁無端經險道依舊到明州親

友頻相慰林泉且自謀家人環坐問歷歷溯前遊

陳鈞堂比部康祺招同趙觀伯戶部家薰錢西箴

員外瀚孫章藻卿舍人鏊馮運君如瀚俞筱雲斯

瑀兩孝廉劉藝蘭鳳章張溪蘅景仲兩文學登海

曙樓飲酒作歌

霖霖三日忽開霽萬木森森弄澄翠孤輪捧出驕陽驕  
白晝鑠人汗流背郡中有樓三層高窗戶洞達天風號  
元龍置酒招我飲兩筵列坐談興豪鮮魚肥鰠競登席  
浮螳盈樽水光碧分曹拇戰譁呶聲登壇主人對壘客  
客主大半長安歸緇塵黥積京洛衣乘此清風快一洗  
澆胸塊磊三百杯傳杯換酒忽無語六月清涼頓忘暑  
憑闌一豁雙倦眸太皎無塵廓天宇羣峯四面如列屏  
東看太白西四明金戟突兀阻南望攝入吾眼皆空青  
城外之山城中塔金碧凌虛恍離合樓頭斜指日月湖

若有仙人駕瑤楫吾生佗僚常出門江南畫舸燕山輪  
不如故鄉一尊酒靜酌元化頤吾真韶年草草付虛擲  
錢生悵然起吹笛劉伶桓伊不再生萬咽千鳴蕩精魄  
此樓舊題節帥門旗旛獵獵貔貅屯如今太平不事戰  
詩酒宴會羅琴樽樓上笙歌日相續樓下衢衢聚肩輿  
科頭赤腳炎火中仰視清虛此樓獨此樓之上尙有天  
瑤臺壁宇多盛筵奚不挈我方丈巔下瞰塵世浮雲遷  
金仙一醉當千年

卽事寄許竹簣庶常都中

短榻疎簾樹影斜春明舊夢記繁華歡場歌舞遶巡酒

歸路關山薄笨車賸有孤懷酬冷月悔邀俗侶訪名花  
羣芳取次天門種極北樓臺望眼賒

二

湖上家園昨已非珠郎近日可相依通侯門第空彈鋏  
大道塵埃半積衣珍重故人分手語淒涼孺子賞心稀  
君家許俊稱豪士曾取歌姬策馬歸

陳母盛太淑人執紼詞

母盛氏家慈谿父爲郎官京師母年十四歲父歿於任  
喪北歸以一弱女子扶輶娥江湄哀動行路路人皆  
涕洟娥江古有孝女碑千秋絕妙邯鄲辭母年適與曹

娥齊孝女之孝前後相光輝

二

父服闋嬪於陳陳大族世籍鄞祖姑楊氏姑張氏寵命  
墨受

天子恩張淑人事姑以孝聞婢媼伺其側而乃扶溺拭  
穢皆躬親母既歸襄厥勤兩世豫順一家歡忻僉曰新  
婦賢當有令子光吾門

三

乃相其夫有治內才夫以輸餉功

帝錫朝議階母爲恭人亦命婦服御寒儉無繒綵朝議

素好義歲歲輸其財建祠設塾造杠砌路散衣給樵織  
鉅靡弗該母也贊之于于唱隨由親及疏以漸推所以  
朝議之歿宗郇戚里一一心悲哀

四

母所生三鳳雛伯子繼父筦家政朝夕左右承歡娛仲  
季能文章聲譽馳通都昨歲同舉鄉爲郎爲中書今春  
禮闈竝報罷束裝省母戒舟車重五前一日遵海而還  
家<sup>叶</sup>母嘗病三月初及是已霍然歡笑溢門閭豈謂秋  
夏交驟爾感風邪<sup>叶</sup>藥者醫禱者巫閭浹旬者再遂奄  
然而告殂哀哀諸孤何以報勤劬嗚呼母儀絕世無

五

母以仲兒官錫茲

朝命新曹郎晉五級得封太淑人同治七年七月季旬  
母歿之歲五十二春乃筮葬期乃相芝山墨卜而食奉  
母殯焉維不佞交紀羣預賓座浹領聞製誄辭紀母賢  
後有列女之傳士女之志其附我此篇

病中雜憶

窮巷多秋氣經旬不出門深宵孤榻冷微雨一燈昏藥  
每雛姬勸詩同癰鬼論遙思天末路渺渺寄情根

二

黃浦尋春地秋來有報書家山羈病鳥河水泣枯魚樹  
暗湖邊謝花催陌上車茅容雞黍約老興更何如茅杏苑理  
問杰約余重遊  
滬上不果往

三

驅馬紅塵道蕭蕭易水征放懷畱楮墨馳譽到公卿羌  
笛孤兒怨陶生誤入曲部屬程客伯靈旗死友情屠蓉仙孝  
廉歿於都中  
余以其樞歸那堪回首憶雙淚送歸程

四

幾輩西泠客首書太寂寥秋風張翰宅張子虞流水許  
渾橋許培之落拓青衫酒飄零碧海簫更繙居士集一



例華陽遙

譚仲修同年廷獻

五

使者持新節羣山馬上看

張蘄濤編修師越材收竹箭之洞視學湖北

楚俗怨椒蘭兵燹荒涼久膠庠整頓難東流江漢水何以挽狂瀾

六

不見胡安定頗聞彈墨新

胡仁齋司馬師寶晉被議降教授

世難容直

道公自稱儒臣薄宦家非遠明時俸亦貧青氍吾故物

早已厭風塵

七

蜀國千重險

王賓陽判官歸嘉定

江城百里符

沈芸閣同年出宰江西

故人

多惜別吾道豈終孤健筆興公賦

徐爽泉少尹思基隱居天台

扁舟

賀監湖

孫峴卿同年德祖家鏡水

鄰封原咫尺幾日訪征途

八

況復晨星感悠悠別夢長文章悲謝客

謝鞠堂工部輔站卒於官歌

哭憶王郎

余自北歸王意山孝廉逝世已匝月矣

冷月新詩冢酸風舊酒

鄉擁衾寒不寐回溯更神傷

六一山房詩集卷八

六一山房詩集卷九 己巳庚午

鄞董沛覺軒

己巳

四明山心漢隸歌

四明之高高插天舊以丈計萬八千山心一峯號杖錫

在鄞縣南磨崖漢隸誰所鐫橫徑二尺字直下揮灑煙

雲墨痕化靈光呵護歷劫存漫以神仙相假借

近人杖錫寺志

謂是晉葛洪書誤也是山縣互三州中奔牛西去驚浪東全圖縱

觀目了了大書深刻標主峯唐代四明建州治謂此山

心在鄞地遂以祖幹名吾州北越南台兩支系州統四

邑開元時歷千百載無異辭古人何意好偏護強奪公  
物爲我私姚江遺老蕭山客乃與四明爭主脈黃梨洲  
謂主山在餘姚豈知漢隸有定名奚不登山考石刻吾鄉碑  
碣唐宋多此隸最古今不磨徐陵搨之記本末謂柳泉舍人  
我師其意成長歌

雜感

一唱河梁古別離舊時門巷已全非邯鄲酒冷才人嫁  
江浦書來蕩子歸殘月模糊畱扇影迴波淒怨寫琴徽  
傷心惟有堂前燕猶傍湘簾款款飛

金勒珠幮九陌塵長安春色爛盈門徒誇名士牛腰卷  
畢竟貲郎犢鼻褌退院題詩多秃筆旅窗話雨有清樽  
桃花別後應無恙南國相思已斷魂

三

悔作蓬萊海上遊洪喬莫問寄書郵東風不與孤帆便  
西子難將定鏡求眼底江山餘暮氣夢中花鳥儘春愁  
月明三五沈沈夜未許崑崙借箸籌

四

乘槎無路盼銀河蕉萃空囊奈爾何末俗揶揄山鬼笑  
舊遊零落洞仙歌冥情漸入非非想悶腹應呼負負多

安得揚州騎鶴去閒來消瘦病維摩

題陳子相明府四餘讀書圖

吾家季直氏讀書稱三餘君乃衍以四雖老亦讀書

蓋以

老爲生之餘也

將壽補蹉跎

劉賓客句君取爲楹帖

古人愛居諸刺取舊

詩意呼工寫爲圖君髯修而蒼君貌清且癯左手執一

編兀立當庭除聞君少好學萬卷供藏儲獻賦甘泉宮

馳譽長安都一官走五嶺百里飛雙鳧君曰不得志掉

首吾歸歟城西學老圃樹藝蕃瓜壺以課疏水供五斗

眞區區暇日理舊業閉門賦閒居諸郎亦彬彬滿屋聲

呬唔君有讀書法爲古淵明徒不必求甚解諷詠聊自

娛考據及著作於我非專家 我但取適興書味相涵  
濡走也熟君語盎然皆道腴自愧學力孱捫腹嫌空疏  
荏苒過四十坐令白日徂識君畫中意題此重感吁耄  
學有抑戒古語良不誣試問年少子讀書當何如

喜晤王紉薌員外

五年別已久握手重相逢郎君隨作客饒有名父風藹  
藹荆樹花庭戶春氣融知君有真樂卻在無言中開門  
對巖壑修篁間喬松山光與怡悅掃石題遊蹤舊得海  
外信聞君如坡翁使我心惻惻欲訴將何從一笑今見  
君慰我飢渴衷與君酌清酒歡然話離悰猶慮後時別



勞燕西復東別亦不足慮但願音書通明鏡已華髮轉  
瞬非昔容毋效狂阮流日暮悲途窮

徐舍人水北閣題壁

地亦依城市居然避世譚新年啟書局

鄞志局移寓閣中故事

屬君家

徐健庵修一統志以書局自隨

高閣常臨水閒庭可藝花西山

供遠眺樹樹夕陽斜

和作

會稽

孫德祖

峴卿

蕭然一几榻頗厭俗情譚抗手伸舒席傳心季長家  
我來尙春雨久客見秋花曾否鄉書到愁看雁影斜

同縣

袁

杰

諤

斗室開壇坱銜枚士不譁春秋無暇日文史有專家  
閣小書爲壁燈深眼欲花慙非通鑑藁草草墨痕斜

送王研農舍人歸象山兼示歐仲真員外

王郎年少真奇才異軍海上舉旗來初唐四傑衍宗派  
林蕙思綺何有哉吾鄉駢文古無作姚令開山號沈博  
謂復莊先生四明一脈支峯多首座吾推甬東郭謂恬士同年眼

中落落誰繼之王郎突出名與齊別有古香寫生色一  
洗世俗凡陋姿太微仙闕華筵高霓裳祕曲鏘笙璫王  
郎酒酣書滿紙畫家能品詩家豪我以舊詩頗失散二  
十年中餘九卷編成爲我作題辭同輩王郎是予宴薰

風四月吹客衣匆匆別我將南歸何時倒篋覽新製我  
夢已逐孤帆飛歐九不見三年餘案頭諒有盈尺書王  
郎歸舟過西滬道我問訊今何如

哭李潔甫孝廉

厚延

與子同鄉里都門始識顏簪裾春宴盛囊橐旅遊艱滄  
海孤心在高空倦翮還那堪驚死別長此夢燕山

二

科第猶餘事明州族望高十年戎馬警一輩父兄豪舊  
恨畱湖曲新愁續楚騷諸孫承祖視淒絕白頭搔

放歌行

一日一醉身飛空  
鶉衣爲鶴車爲龍  
天門詠蕩兩蛟倚  
以額叩之帝爲啟  
羣仙袞袞趨早朝  
珮衣玉節金步搖  
蓬萊產芝三萬本  
我落其實青不凋

二

東家桃花李花白  
西家女兒好顏色  
李花落盡桃花飛  
女兒嫁作屠沽妻  
人生萬事有真宰  
幾見桑田變滄海  
巍巍太行移過河  
十年眼底愚公多

三

我有寶劍光熊熊  
偶然飛落江湖中  
黃冠道士誦神咒  
明年當化雙白龍  
一笑歸來坐高閣  
寒漏孤燈鬼聲惡

開門仰視月在天風露淒涼袷衣薄

四

銀河沈沈夜將旦西有長庚獨星爛此星動搖占主兵  
諸軍帶甲關西征男兒開口談經濟鄉里小兒聽之睡  
驚馬不上燕昭臺金印斗大誰將才

五

黃門繼起建安霸豈料虛空謫仙下杜陵布衣稱兩雄  
後有作者無此公隻手捫天取箕斗萬蟻聲中猛虎吼  
棒頭一喝禪家機會我詩意微乎微

六

飄輪四馳激電火兩大無端著一我尋常豈有陶朱公  
浣女夷光五湖舸半生潦倒妻孥愁苦作奇夢思千秋  
東方先生墮塵劫來日願假侏儒裘

七

胞衣墮地哭聲作原曉世間非可樂憧憧貿貿蠅狗來  
天帝下視皆塵埃小兒楊修大兒孔埋骨青山弔荒冢  
日精月魄雙丸流暮雪飛上嬰孩頭

送人之揚州

江荻蕭森野草荒片帆風送到維揚虹橋煙景無人問  
應弔瓜州古戰場

聞陶生將歸杭州卽事成歌寄程容伯少卿樓次

園侍御震都中

去春我作都門遊黃塵黯淡蘇季裘尋常歌舞不稱意  
往往痛飲消牢愁陶生邂逅同杯酌自言家住杭州郭  
阿母死節父死忠天涯隻身此淪落隸名曲部今五年  
鄉關南望何時旋我亦空囊苦羞澁不能爲爾一手援  
高樓晝日罷春讌醉墨淋漓書便面義心苦調維告哀  
投筆長吁淚如霰於時酒客同鄉多就中許子謂培之同年  
聽我歌攜詩出門謁諸老少日便賦高軒過程翁頭白  
尙豪舉巡城繡衣恰行部相將訪我旅邸中樺燭分行

對賓主飛箋喚取陶生來當筵宛曲前致辭更殘漏盡  
罄顛末二老惻惻驅輪歸榴花照眼紅五月鄉思催人  
行李發無端勞燕東西飛把酒長亭痛離別別時珍重  
畱贈言兒家門巷無一椽諸君許我訪親屬誓心旦旦  
誰見憐滄溟迢遞孤帆送夜月燕山度魂夢數叢晚菊  
霜色淒千樹枯梅雪痕凍杭州數載經烽煙蓬蒿匝地  
空茫然許子徧詢杳無跡但見彭澤荒蕪園鳳凰山下  
逢老婦夫在轅門效奔走過江王氏雖名家戶冊依然  
陶姓舊門首書積善堂陶四字陶祖父爲浙省  
提塘亂後無人承替其壻王某代之對客縷  
縷言合符問名知爲陶生姑許子聞言喜不寐挑燈夜



草長安書長安二老接函啟分俸經營恤孤釋遂令羈

鳥脫樊籠今古雲天頌高義櫻桃十里花盛開鮮衣怒

馬多狹邪叶千金買笑不買駿有誰更上燕昭臺我自

前年別京洛九轉離腸殊苦惡徐陵書去無報章柳泉舍人

以詩札寄洪給諫昌燕屬王悅舟歸竟虛約朱同年世篁約杭人

爲脫籍給諫歿事遂已王蘭階攜幾疑好事遭折磨書空咄咄將奈何今冬喜

音自天下坐覺庭戶春風和陶生寄書正重九欲涉無

梁尙須友雲山南北千萬重可能殘臘歸家否脫驂翻

受程子恩古有樓緩能解紛劫餘難裔僅一綫教坊替

贖孤兒身若敖餒鬼猶求食苦望秦庭完趙璧我爲感

激重涕零襟袖斑斑蘸寒色

恭紀宋儒袁正獻公從祀

文廟詩

皇帝御宇同治六年浙撫臣貽

謂馬中丞新貽

稽首上言臣惟

孔子素王垂統漢唐經師以迄有宋宋受天命奎婁啟  
祥光光濂洛濟濟門牆卓哉微公挺自南渡顏孟指歸  
周程趨步維時金谿以悟爲宗往復辨難皇極大中兩  
戒江河崑崙一脈鹿洞鷺湖斯道之翼金谿著錄高弟  
惟袁產臣屬郡宋曰慶元清門世胄代有名德篤生魁  
儒以匡王國幼悟槃水理境湛然長仕於朝希蹤聖賢

浮沈下僚參預邊事游登棘槐經筵入侍侃侃諸疏拳  
拳一心陳力就列援古證今權相主和以媚強敵君子  
見幾拜疏辭職論其師友不名一家融會眾說擷取菁  
華東萊文獻止齋經濟麗澤交資冰瑩玉粹光祿贈官  
正獻易名元修宋史臚敘生平七百年來遺書散佚遭  
逢

聖朝大啟沈鬱我

純皇帝延閣修書錄自大典

襲爲眞儒詩義文編

宸章弁首

天語煌煌垂示悠久臣質輿論參諸有司惟此宋儒從祀允宜惟天之高惟孔之卓惟此宋儒不愧於學臣桂謂英督部桂臣義謂吳學詢謀僉同惶恐再拜上達聖聰

天子曰咨疇典邦禮公卿百僚集議

殿陛乃據祕籍乃考史文明年七月禮官疏陳晚宋諸儒袁氏傑出

先皇嘉之榮於華黻宜祀兩廡次呂祖謙學統攸寄祀事孔嚴

制曰可哉頒行天下禮部傳宣黃麻謄寫圖流璧水土

庠下庠簠簋籩豆芹藻薦鄴粵惟四明地號鄒魯從祀  
之儒曠絕前古懿我袁公陸門一人亦有舒沈惟公軼  
倫西山有狀慈湖有誌理學傳家蒙齋繼世高山仰止  
翼翼巍巍於惟袁公百世之師

同舍弟泛舟東錢湖

料峭西風送暮寒  
片帆搖曳水雲閒  
無端吹入蘆花蕩  
斜攬船頭飽看山

二

山外千家傍水居  
炊煙幾處影模糊  
蕭蕭紅葉停車路  
指點秋巖夕照圖

三

最上高峯接翠微  
迴環石徑荷樵歸  
陶公去後無人隱  
冷落青山舊釣磯

四

水田漠漠鷺鷥飛  
半向東來半向西  
兩岸湖波太空闊  
中流祇少白公隄

五

澄碧浮空鏡影圓  
四圍山抱一湖寬  
前村唱出漁舟晚  
疎蓼殘荷下水灘

六

咳唾隨風萬里流滄溟我亦寄扁舟莫言觀海難爲水  
如此風光足勝遊

七

湖上知交半死生山邛華屋總關情鄭嗣庵舍人赤厓  
湖文學世濟小樓廣文順則叔明經錕毘季袁瞰  
姪暨忻橋仙明經葆善竝下世寒蛩野草多衰意似聽  
秋墳鬼語聲

八

舊蹟年來惜已荒平泉莫問相公莊千年刹宇依然在  
管住名山有梵王

九

歸途閒向寺門過畱客偏逢衲子多卻與潁濱同此夕  
望湖樓上話東坡

庚午

鄞志局偶作示同事諸子

作志猶史然所貴具三長自惟謏劣才濫厠作者堂曰  
稽

高宗朝錢侯維喬令吾鄉縣志辨體例引據頗精詳邇來

遭兵火棗本亦已亾相距幾百年墜緒終茫茫及今猶  
可爲於以恭梓桑大廈構眾材土貢羅諸方遂使瓜與  
壺聊備農家糧



二

圖經肇南宋四明志傳本逮我

開國初歷代志郡邑乙部供藏儲卓哉東海徐柳泉舍人前

輩王厚全謝徒篝燈校遺籍手刻六志書宋元郡志五種及大德昌

國以之領書局熟路駕輕車張鐵峯舍人恕陳子相本耆宿

揚鑣騁通衢分曹授諸子一一吹齊竽謂周可表文學宗坊袁襄臣文

學士杰及袁諤齋陳駿孫兩明經劉近可軼聞周遠以

藝蘭文學陳鈞堂比部孫峴卿孝廉追張胡邑志者何日覩定藁使我心目舒自戊辰四月開局今

三年矣

三

明代錄祕閣鄞志收其中

文淵閣書目有鄞縣志吾鄉無傳本四五百年知之者鮮

矣  
哀然一邑書剏始誰之功於時纂大典分韻以類從

檄取天下志卷卷充上供吾鄉雖有作副墨無遺蹤今  
我繼前修何由參異同搜羅務求備取舍秉至公圖王  
尙成霸亦足稱代雄公等交努力須幾文獻宗

本事詩爲友人所作

簾外飛花點舞衫春風消息又江南  
喁喁燕語鄉音改  
頓頓魚餐食性諳分袂總畱明日約  
翦燈常伴徹宵談  
靈和垂柳原無恙張緒而今老不堪

十載湖亭記舊遊  
阿儂嬌小不知愁  
畫屏倚燭畱纖影  
翠袖當筵暈薄羞  
一笑投懷偏宛轉  
幾回攜手且勾畱  
匆匆最是河梁別  
桃葉無蹤水自流

三

茫茫身世歎蟲沙  
僥倖人間有押衙  
漫道南山能作判  
卻憐西子竟還家  
秋曹鐵筆翻疑案  
香尉金鈴護落花  
一櫂越江歸去路  
門庭惆悵亂啼鴉

四

新卜園亭傍水居  
蕉陰涼爽竹陰疏  
圖中位業參仙諦  
劫後因緣證佛書  
風定博山煙是篆  
波微斜漢月如梳

江頭誰是青驄馬  
油壁空停昔日車

五

穠李纖桃隔岸開  
門前邂逅故人來  
妝臺舊葉編疑雨  
曲院新聲記忽雷  
乳燕棲梁春有約  
鬢鴉欹枕夢初回  
傷心低語平生事  
落月三更漏幾催

六

一樣青衫有淚痕  
繁華回首已如塵  
評花自印空中色  
拜月閒消世外春  
已分琴絃成別調  
翻畱鈿盒續歡因  
靈均綺語知難懺  
無限牢騷託美人

贈張老

江城燈火麗元宵社鼓殷闐暮復朝曾聽茅檐談往事  
昇平行樂

睿皇朝

二

少小離家作遠遊沈寒天氣不須裘年來自說龍鍾甚  
倚杖門前看病牛

輓張小峯都轉

鼎輔

羣季論交二十春與君聚首總無因還鄉賀老纔經歲  
立社樂公已古人百日危城籌筆健九河故道護隄新  
東州士女畱遺愛應見靈旗到鬲津

二

戎馬縱橫羽檄飛吾鄉遊宦幾人歸幼成已固交南節

謂王太僕淑元

仲度難攀渭上旂

謂傅明府自銘

齊乘獨畱賢守在潘

輿時念老親違可憐乞養無多日不見堂前舊舞衣

### 夜發鄞江

一櫂西風急江湖遊子吟暗潮生夕浦微月下秋林涼  
簾無歡夢孤琴有好音蘆中聞落雁隨處警詩心

### 餘姚縣

此地藩吾郡居然擊柝聞遙山千樹合流水兩城分楓  
荻新秋意墩臺舊戰氛炊煙欲相接墟里半斜曛

自陡疊至驛亭填

上填復下填兩索縋一船篙師袒身臂努力爭後先聒  
耳邪許聲時復驚我眠攬衣起徬徨仰視星斗懸霜露  
應秋氣襟袂生微寒動中悟靜理至妙非言詮茅屋三  
兩村漸有鄰雞喧中流自在行高唱明河篇

越中懷古

娥江西去越王城鏡水稽山作畫屏一載荒朝廷閏統  
六陵坏土瘞殘銘遙天虹挂秋巖碧古驛鴉啼暮靄青  
不遇中郎誰顧曲我來憑弔倚柯亭

渡錢江

西望杭州十里賒三分江面二分沙行行一路平如砥  
野草無名半作花

吳山晚眺

營壘縱橫記昔年依然蒼翠畫圖看城隨山勢相高下  
路傍牆根幾屈盤秋樹聲中孤鳥去夕陽影裏萬家殘  
何堪重勸吳姬酒南渡繁華舊夢寒

示家菁沚廣文坊

吾家貫明州肇自南宋初辛苦戎馬間卜宅城東隅逮  
及明景泰分爲三處居伯以官爲家曲阜拜新除仲季  
遷高塘離城廿里餘惟叔及第五仍守先人廬萬歷壬



子歲高塘修譜圖第詳仲季房纍纍如貫珠山左隔南  
北路遠或忽諸城居近在咫尺亦復蹤跡疏君家世城籍  
故老傳非誣謂與高塘支同軌無殊塗我則生於鄉交  
遊徧通都識君十七載時時戒舟車君兄湖嶼舍人增爲我  
言江河源不殊盍往拜家廟聯綴爲一書嗚呼言在耳  
而惜君兄殂此事殊未了重泉良感吁君又苦薄宦行  
李羈征途三年一握手乃在明聖湖笑不早歸來歡笑  
溢門閭聯牀話前好君我昆季如可以次家乘一一相  
印符毋俾風塵中坐看白日徂

南屏張忠烈公墓

十九年臣節完名葬此山平黃紛閭位丹赤照人寰北  
地徽欽狩南都馬阮姦運當明祚厄力起魯王孱帳殿  
朝天闕樓船泊海灣飄零昌國島痛哭秣陵關別部軍  
心亂長江戰血殷藥囊空倚傍芒屨歷危艱復見征麾  
出猶思墮鼎還結盟通鄭使拜表入滇蠻落日金戈指  
嚴霜鐵甲擐寓公憐故主樞相列新班盡瘁懷諸葛招  
降拒伯顏楹書勞夢想杯酒指創斑閩越經營處瞿何  
伯仲間願爲三漢傑竟作兩周頑厭德難違命畱身敢  
乞閒殘兵風駭散懸畧水迴環糴等如齊告弓偏射羿  
彎戴頭棲狴犴反面恨豺獍馬角生何冀龍髯痛未攀

臨刑遺檣墨埋骨翳榛菅

聖代褒忠渥

殊恩謚典頌更編文陸傳史筆莫輕刪

讀史感作

高山番草已成空又見乾兒拜上公  
一輩姓名闔黨傳  
幾人祠祀厥臣功  
俄聞齊國誅莊賈  
猶勝蘄州竄守忠  
門下中郎應有恨  
湖干揮淚灑秋風

二

黃門小隊侍中貂  
烜赫衣冠氣勢驕  
使命倉皇行省隔  
鬼魂飄泊禁城遙  
悲歌誰送荆卿市  
遺蹟空畱李廣橋

灑掃掖庭家法在鐵牌原鑒漢唐朝

雪夜與姬人飲酒

空庭積微白靜坐寒在衣酌酒相對飲漸覺春意回  
竈婢喚不醒脯果啣解飢瑣屑道家事猶恐兒驚啼  
笑指瓶中花位置得所宜近與燈火親弄影頗有姿  
似聞一縷香沁我心與脾醺然倚屏榻醉賦消寒詩

六一山房詩集卷九

六一山房詩集卷十

辛未

鄧董沛覺軒

辛未

賀徐柳泉舍人生子卽效其體

城西故人徐仲長年五十八鬚眉蒼與君相違僅一月  
聞君大有門閭光君甫四十立嗣子長孫讀書十三矣  
侍姬少小歸君家三索得男君更喜椒花獻歲春滿卮  
雌聲兩應雄聲啼燕姑徵蘭兆奇夢君也少子姬長兒  
牙籤萬卷收藏好子孫永永爲世寶白首傳經兼有男  
漢代何嫌伏生老去年我客杭州城八月還家兒始生

少姬顧我但微笑料君今日同此情賓朋杳來宜置酒  
我已飲君君報否異時各各兒長成騏驎駑駘孰先後  
我願同樹騷壇旗兩駒齊首追隨之子又生孫孫又子  
我當耄耄君期頤

江干別舍弟

明知行萬里只在此年中不道分離日相看涕淚同月  
移江岸樹心逐海門風今夜輪舟夢還家一水通

大風出鎮海關

萬斛舟如一葉輕揚帆東出虎門營羣山齊挾濤頭過  
如許峯巒數不清

滬上

寒雨連江曉泊船舊遊回首已三年  
般倉待運天津粟  
過市新添日本錢  
估客樓臺涵蜃氣  
酒家風味足魚鮮  
不堪重聽琵琶曲  
蹭蹬青衫亦自憐

南槎山

迤過崇明島孤峯此建標  
旗占風色定鍼指水程遙  
鯨海都空闊龍宮想寂寥  
汛防循故事兵氣已全銷

黑水洋歌

海水初黃漸成碧船行益東翻  
黑色是豈天帝臨池書  
大筆淋漓蘸餘墨星星島嶼路幾千  
汪洋四顧惟有天

天水空濛互迴抱望似平圓實渾圓自從黃河奪淮口  
雲梯關外積沙厚巨舟礙底不敢行避險遂開新道走  
陽侯坐鎮扶桑東江漢萬里來朝宗予圭告成制尙黑  
是水亦賴神禹功蛟螭潛藏杳無跡墮石量繩三百尺  
眼前耀作倭漆光船輪蹴花依舊白孫公談圃稱渡洋  
食物皆嘔惟飲漿四年兩度吾過此臥非木匣身如僵  
混沌一氣剖眞宰東海有程通北海以方配色無定形  
甲木從生原癸水水面風息仍起波千三百里一日過  
明晨可抵日照界槎山矗立青峩峩披衣寫我詩境廓  
古無是題安有作夢想三成予圃遊快御長風跨鸞鶴



北槎山

一涉重溟險齊東復見山雲蒸嵐氣重濤汨石頭頑巡  
哨分期會樵蘇絕往還憑舷觀碧漲談笑爲開顏

之罘島

我思齊景公遵海觀之罘耳聽徵招音私比先王遊如  
何嫁弱女涕出不自由堂堂霸國餘徒爲蠻夷羞臨風  
一悲嘯轉眼成千秋猶畱此孤島蒼色盈吾眸明隸奇  
山所今築西洋樓島夷本卉服雜處萊與牟安得高固  
石飛擊徐承舟往今一體耳寫作高唐謳

廟島

大竹鼉皮

名島

勢若聯最高遙認此峯巔依山耕種難成

聚防海墩臺早息煙三面界通青冀域一帆風到粵閩  
船斜陽欲墮艙門影計可明朝路入燕

三岔河

比屋臨河水氣清渡航西去一橋橫依然游釣鄉關路  
添得輪蹄絡繹聲

楊村

辛苦蠻舶來今日始從陸客路不敢驕丁甯戒僮僕車  
行五十里炊煙起茅屋駐馬勿復前望門且投宿楊村  
濱大河篙櫓轉倉粟京東要害區土壤不宜穀昔聞靖

難軍於此曾敗衄莽莽古沙場何處有遺鏃往事如浮  
雲過眼一何速姑待山月高高空快瞻矚

河西務

暮日河西務疏林葉盡凋馬疲知遠道龍戰話前朝慨  
想中山傳經營北渡橋直沽遙望處東去水迢迢

抵寓齋作

路入沙河門猶是塵飛揚迂曲三四里我馬初脫鞅行  
裝暫棲止比屋如僧房位置妥牀几空隙安篋囊已見  
林際月微透窗戶涼倚枕且弗眠宛轉思故鄉

二

二二  
言集  
卷一  
渺渺三里河昔爲魚藻池南泉有古寺

三里河  
橋側

朱李曾

寓斯古人不可作應恨吾來遲安知非舊遊當日同賦  
詩秋錦但兄事長蘆吾所師願借佛座香稽首誌皈依  
三月三日登觀象臺

重三時節當重陽乘興登高恰曉涼放眼通州城郭外  
潞河一帶送帆檣

二

萬象都歸轉運功望中星宿本羅胸不須更憶毘盧閣  
彷彿諸天廿六重

二忠祠

二忠祠榜鮮魚口文山死前文水後遙遙相望四百年  
前忠後忠兩山斗慈元行殿飄重洋黃冠不得歸故鄉  
從容談笑託兵解天日黯靄愁無光廬陵本是忠義地  
雜然賦形多正氣元祚一瞬下迄明衣鉢相傳李公繼  
鐵馬曉蹴千門塵煤山淚血霑衣巾南都撫軍計不用  
吁嗟李公乃殉身紛紛傳疑滋舊史謂公投纆亦柴市  
豈識廬陵試館中前忠有祠後忠死潯江不汨蛟龍腥  
揚波重水皆精靈靈旗彷彿自南至英風颯爽神在庭  
我寓相隔僅里許驅馬經旬過祠宇徒從史傳想生平  
不及登堂拜公主滄桑變換畱劫灰祠前老樹烏啼哀

丹青土木已非舊我歸且賦招魂辭

燕臺雜興

燕臺形勢鬱嵯峨酒市重聽擊筑歌東望海雲迷碣石  
西來河水注滹沱三關翼衛神區壯五代經營古蹟多  
芍藥坡前春意散勝遊無奈鬢絲何

二

極目崆峒戴斗鄉臨風憑弔更神傷雙松冷落觀音寺  
萬柳淒涼宰相堂諸老遺文摩斷碣故家頽壁倚殘陽  
九門多少輪蹄跡去馬來牛底事忙

三

物換星移舊事銷  
村民抵掌說前朝  
大都門蔭金貂賤  
上國軍容鐵騎驕  
人海衣冠塵滾滾  
佛天鐘鼓夜迢迢  
漁陽那得霓裳曲  
卻把妝樓改姓蕭

四

錦城絲管總繁華  
一例恆河墮劫沙  
節帥幾人藩鎮傳  
厰臣千歲帝王家  
蘆溝賸有傷心月  
槐市空餘絕樣花  
且向壚頭拚醉臥  
斜街門巷日停車

觀劇行

橫街對壘南北樓  
查家四宜今其儔  
梨園巧譜明僮謳  
三日四日輪一周  
招邀勝侶尋春遊  
驅車過市塵撲裘

早日預屬官座畱雜具盈案茶盈甌美人開簾伴作羞  
珊瑚壓鬢珠絡頭娛光曼睽澄雙眸顰嫵添畫初月鉤  
秦腔激越伊涼州吳歌嬌轉雛鶯喉纖塵不動微風悠  
蕩滌苛慮消羈愁買噀買笑不自由撒手若與黃金雠  
斜陽西墜樓窗幽歸路恨比來路修車夫對我雙涕流  
自言生少家虎邱阿爺賣作燕市優江鄉迢遞空寄郵  
登場拂拭紅巾禱迴出儕輩無與侔長安遊俠停驂驅  
箏琶簫管相唱酬纏頭百萬傾囊搜華麗宛若年少侯  
陡然一病經年瘳容顏改換無人收撓鞭且向高門投  
聽人驅策呼馬牛我聞此語頗煩憂春花綢繆容易秋



不如歸邊蘅芷舟櫂歌送入風颼颼

龍樹寺

荆榛彌四望車路亦難平古寺常畱客虛窗恰對城  
癯僧疑定相飢鳥有淒聲獨倚槐陰下還將濁酒傾

燕部雜詩

誰遣春風度玉關灤陽冰雪賽容顏落花時節飄零客  
曾隸伶官供奉班

二

玉立亭亭稱舞衣巧將燕瘦仿環肥宮牆偷得霓裳曲  
爲爾深宵帶露歸

三

手理琴絃玉柱斜自翻新拍按紅牙羣芳盡入燕蘭譜  
猶認豐臺第一花

四

屏側低窺玉樣姿可堪風雨怨啼時南鴻一去無消息  
苦憶湘靈有夢知

五

惆悵風流自在身天花飛舞鏡中春最難香界維摩室  
依舊緇衣見故人

六

烏栖門巷晚停車鄰院香分阿姊家一樣丹青工設色  
海棠斜映茜窗紗

七

記得分司喚小名笛家重唱遏雲聲亂頭麤服吳儂懊  
無限秋江怨苦情

八

躍馬彎弓窄袖衣花兒素嬈想依稀何人偏抱劉豔癖  
愛看崑崙黑衛飛

和陳駿孫孝廉京邸雜感原韻

庭樹無多影孤懸塞月高相憐春女怨難作酒人豪飢

乞陶公米寒生范叔袍深宵欹短枕聊息此身勞

二

溫石河陽幕何年望禮羅乾坤容我窄書史似君多醉  
欲呼天問憂來斫地歌五侯門第貴驅馬但經過

三

忽想河西道紛紛羽檄馳關山頻戰伐道路況流離  
老徒思櫪鷁安尙借枝蕭閒吾輩夢去去欲何之

四

旅懷同落寞相對一城間試作空花想應知倦鳥還風  
波皆宦海事業有名山莫負千秋志蹉跎白日閒

原作

鎮海  
陳繼聰

日到幽州淡天容似更高琴寒音易澁酒薄興難豪  
樹影搖頽壁沙痕漬敝袍微名驅我至身世太勞勞  
二

鄉國科名盛頻年入網羅詎真良驥索絕似鯽魚多  
好唱無愁曲爭傳得寶歌運河回首路一例布帆過  
三

都門塵十丈道上轂交馳風景多明媚鄉關此別離  
老猶遮席帽醉且妬楊枝春色渾無賴閒情偶賦之  
四

也曾持刺謁碌碌衆人間  
鵲立苦延盼騾蹄疲往還  
長途風落木歸鳥日銜山  
何似老巖壑梅花相伴閒  
同人飲江亭餞別

此日開此筵飲酒慘不樂  
亦知難再留悽然贈勺藥  
微風吹野花輕燕與迴掠  
恍見垂手衣低舞勸杯酌  
拂拭苔蘚痕摩挲舊時作  
前歡如墮塵姑訂後來約  
西山當檐眉夕霽嵐氣薄  
膏車在吾門明便出東郭

潞河

都門三月客潞水一歸舟  
落日關河迴驕心訴短篙

柳

空濛水氣上津亭無數垂楊窄地青有約三年重見汝  
煙鬟霜鬢兩飄零

歸途雜詠

奈何振衣來依舊垂橐歸施媿絕代容遇合無良媒我  
心苦離別肯以貧賤悲莽莽京洛塵面目皆辛黧回首  
顧僮僕亦復顏色淒始信作客勞頗恨行邁遲

二

津門度端陽龍舟競水戲兩岸犀甲軍排空助遙勢濱  
河節相衙三輔歸控制屹然倚長城千里命攸寄瀛海  
恬不波鯨鰐望風避使我歸夢安常假片帆利

三

長夏翻北風順水無驚濤憑舷數洲嶼錯落如浮匏我  
行益東向遠可絕萊膠四望浩無際仰見天沆寥雙輪  
互旋轉聒耳殊煩囂五日抵南岸尙厭程路遙離家祇  
千里暫解憂心忉漸見江月圓高出吳樹梢

到家

昨憶江城路南帆一夕歸琴書畱故篋風雨敝遊衣春  
去花無恙身閒夢亦稀燕山吾有約敢與素心違

企喻歌

七尺昆吾鋏五石弓力强上馬射飛雁下馬擊黃塵



二

聞鼓不聞金將軍陷重圍聞歌不聞哭戰士衣錦歸

三

生爲麟閣臣死作陰山神男兒當自立天地無私恩

哭家菁泚廣文

一別纔一年瞿然得君訃誰謂昆弟情從此隔行路吾  
家隸四明肇自宋南渡明代始析居屬籍不相附究之  
千流分同是一源注遂使我與君覲面早如故韡韡棠  
棣花藹藹紫荆樹譬彼同室歡和樂悟真趣撒手歸太  
虛杳絕塵寰處猶聽孤雁聲淒風叫天暮

二

戊辰夏五月我自都門歸同君纂鄞志比屋時相依每  
溯年少遊裘馬輕且肥春水書畫舫秋社歌舞衣往往  
倒樽酒醉寫無題詩此樂不可再轉瞬容顏非侏儒屢  
笑我常苦臣朔飢君亦守冷宦奔走東與西河梁一分  
袂離索長相思而況成死別安解吾心悲

三

卅載遊杭州不識紫雲洞

在西湖栖霞嶺側

今夏君過之恍恍

得奇夢童子前致辭辭亦非鑿空謂此好湖山是君舊  
清供中秋忽少病復見來者眾黃箋書銜名青衣列侍

從咸請君早歸逍遙取鸞鳳夢醒告家人斯言幸無中  
豈料病愈危倉卒辭官俸一枕大遊仙君死亦何痛

四

君有長者風涵育太和氣繁劇非所長能以實心治道  
路收遺嬰終始竟其事劫後流亡多安養亦勞悴公家  
有餐料主者以月計君獨謝絕之官中一無費所由君  
死時孤寒齊下淚何況我輩情素車哭喪次西望明聖  
湖靈山出塵外君去不可追仙凡頓殊界

寄孫峴卿同年汝州

長夏都門別飄零已歲除相思千里客新寄數行書越

海遲歸權嵩山對寓廬中州多勝蹟遊興近何如

六一山房詩集卷十